



Nunatta Karsiata 2020-imut naatsorsuutaasa Inatsisartunit akuerineqarnissaat pillugu Inatsisartut aalajangiiffigisassatut siunnersuut.

(Aningaasaqarnermut Nunamullu Namminermet Naalakkersuisoq)
(Siullermeerneqarnera)

Tamatta isumaqatigiissutigisinnaagunarpaput, 2020-mut Nunatta Karsiata naatsorsuutai COVID-19-mik annertuumik sunnerneqarsimammata. Soorlulu Naalakkersuisup eqqaareeraa, tuniluunneq pitsaasumik oqinnerusumillu qaangerniarunarpaput. Tuniluunnerli suli qaangiutinngilaq, taamaattumillu aningaasaqarnerup eqqummaariffiginissaanik annertuumik pisariaqartitsilluni. Politikikkut silatusaartumik tulleriarinissamik pisariaqartitsivoq, uanilu pingaartorujussuartut isigaarput, minnerunngitsumillu politikikkut periusissianik pingaarnersiuinissaq, Naalakkersuisut piffissamut ungasinnerusumut eqqarsarnissaat nunap iluani nunanilu tamalaani assigusunik ajornartoortitsinissanut, inuiaqatigiinni sunut tamanut upalungaarsimanissamut.

Tassani ukiup tullianut naatsorsuutit ernumassutigineqarput. Ukiuni qaangiuttuni suna ilinniutigisimavarput? Naammagittaalliuutit apeqquutillu saqqummiunneqartut kinguneqartissavagut? Qanoq ililluta Namminersorlutik Oqartussat tamakkiisumik naammassisaat uuttussavagut politikikkullu aaqqissueqqinnerit imaalillugit, ukiunut tulliuuttunut aningaasartuutitut tulluussarlugit?

Nunatta karsiata naatsorsuutai 320 millioner koruuninik amigartoorutissatut naatsorsuutigineqarnermiit nikingapput, uagullu Demokraatiniit tamaat isigalugu iluarisimaarparput, tassami 455 millioner koruuninik amigartooruteqarnissaq missigersuutaasimagaluarmat, amigartoorulli piviusoq 135 millioner koruuniulluni. Tamanna sorpassuarnik pissuteqarpoq. Ataaserli pingaartooq unaavoq, pisariaqarsimammata tamatta akisussaaqatigiinnissarput, qanoq ililluta akileraartartut aningaasaataat qulakkeerniarnerlugit, tamannalu annertuumik karsip misissorneratigut pisimalluni.

Pingaarnertut pitsaasumik aningaasatigut aqutsineq ukiuni kingulliunerusuni aningaasatigut ingerlalluarnermi, nunap aningaasaqarnera sillimmasersorsimavaa naammattumik, COVID-19-eqarnera atorsinnaasunngorlugu aningaasatigut inuttullu ajoqusiinata. Aningaasatigut ajoqusiinnerit, ajoraluartumik takusagut nunani allani ajoqusiingaatsiarsimapput, inuit suliffeerullugit, ajornerpaatullu inuup inuuneranik naleqarsimalluni, aammalu ilutigalugu nunarsuaq tamakkerlugu inuutissarsiorneq niuerneramik tunngavillit soorlu assersuutigalugu sanaartornermut atortussat eqqorneqarsimallutik. Taakkuupput pingaarnertut nunarsuarmut tamarmut aammalu aningaasaqarnermut avataaneersunik tunngassuteqartut ilinniarfissavut nunatta aningaasaqarniarneranut. Allatut ajornartumik aningaasanut inatsimmi aningaasat pituttorsimasut isummerfigisariaqarpagut, soorlu nunap killeqarfiata avataanut inissinernut, nunap ukiut tamaasa millionilikkaanik akilertagai, aammalu suli aningaasaqarnermut inatsimmi aningaasartuutaasussatut inatsimmi pituttugaasut ilaat.



Sanaartortorujussuuvugut, pingaartumik illoqarfinni annerusuni, sanaartornermut atortut akii, qaffakkaluttuinnarlutik siusinnerusukkullu politikkikkut isummernerit ilimagineqartunik akisunerulersimapput. Taamaattumik pingaartuuvoq Nunatta karsiata naatsorsuutai ingerlaavartumik nakkutigineqarnissaat, kipsisuitsumillu eqqummaariffigissallugu, aningaasaatitta sumut atorneqarnerat. Tassani isumaqarpugut COVID-19-ip ajornartoortitsinerata ilinniartissimagaatigut siusinnerusumiit pitsaanerumik iliuuseqarnissatsinnik. Ukiuni kingullerni marlussunni annertuumik nunatta karsiata misissortarnera kingunerisimavaa, kontut ilaanni aningaasat atorneqarsimanngitsut allanilu atuisoqarpallaartoq. Assersuutitut Dronning Ingridip Napparsimavissuani Tarnikkut napparsimasut immikkoortortaanik illuliornerup nutaap takutippaa, politikkikkut pingaarnersiuerit kinguarsarneqarsinnaasut, aammalu inunnut aningaasatigullu kinguneqarnerlussinnaasut. Inuttut, tarnikkut napparsimasut ukiuni amerlavallaartuni, pitsaassutsimigut kivinneqarnissaminik pisariaqartitsisimammat inuit pisariaqartitsisut pisariaqartitaannik ikiorniarlugit. Aningaasatigut, sanaartornermut atortussat naatsorsuutigisamit akisunerulersimammata nunarsuarmi niuernermit akit ilimagisamit qaffakkaluttuinnarsimammata.

Amerlanerujussuarnik assersuusiorsinnaagaluarpunga, Namminersorlutik Oqartussat allaffeqarfia, aqutsiviit kommunillu suleqatigalugit tamatta akileraarutigisatta sumut atorneqarnerat, aammalu politikkikkut suliniutitta eqaannerusumik innuttaasunut iluaqutaasumik suliarineqarnissaannut pitsaanerulernissatsinnut. Aamma Namminersorlutik Oqartussat kukkurnersiuisaluunniit erseqqissaraluarpassuk, Namminersorlutik Oqartussat aningaasanik aqutsinerat ilorraap tungaanut ingerlasoq. Isumaqarpugulli pitsaanerumik ingerlatsisinnaasugut, torrallaanerumik pisariinnerusumillu politikkikkut suliniutitsinnut akissaqarsinnaalersilluta, taakkulu pingaarnersiortariaqarpagut, soorlu assersuutigalugu peqqinnissap isumaginninnerullu iluani pinaveersaartitsinikkut.

Taamatut oqaaseqarluta immikkoortortap Kukkurnersiuerimut ataatsimiititaliamut aappassaaneerlugu suliarineqarnissaanut ingerlatinneqarnissaa innersuussutigarpot.